

समे – 12:25 hrs.

<><><><><><>

## Headlines

1. भारतीय थेआरबल बलें आप्रेशन सिंदूर तैहत पाकिस्तान ते पाकिस्तानी कब्जे आहले जम्मू-कश्मीर दे केई इलाके कार्रवाई करदे होई आतंकी ठकानें गी नशाना बनाया, प्रधानमंत्री मोदी होरें पूरी कार्रवाई पर आपूं तक्क रक्खी।
2. भारतीय फौज नै प्रेस वार्ता च कार्रवाई दी जानकारी दिती। दस्सेआ जे कुसै आम पाकिस्तानी, फौजी ठकानें या आर्थिक प्रतिष्ठान गी शाना नेई बनाया गेआ।
3. उपराज्यपाल मनोज सिन्हा होरें केंद्र शासित प्रदेश दे सुरक्षा हालात दी समीक्षा कीती। बन्ने कन्नै लगदे संवेदनशील इलाकें चा लोके गी सुरक्षित थाहरें लेई जाने दे निर्देश दिते।
4. मुखमंत्री उमर अब्दुल्ला होरें इक बैठक लाइयै अंतरराष्ट्री बन्ने ते नियंत्रण रेखा कन्नै लगदे इलाकें च सुरक्षा बंदोबस्तें दा जायजा लैता।

<><><><><><>

## Victim Families

पहलगाम आतंकी हमले च जान मोहाने आहले शुभम द्विवेदी हुंदे पिता संजय द्विवेदी होरें आप्रेशन सिंदूर राएं पाकिस्तान ते पाकिस्तानी कब्जे आहले कश्मीर दे हिस्से च आतंकी ठकानें पर कार्रवाई करने लेई भारतीय फौज ते प्रधानमंत्री नरेंद्र मोदी हुंदा आभार प्रगट कीता ऐ। आकाशवाणी कन्नै गल्ल करदे होई उनें आखेआ।

तोआई, पहलगाम आतंकी हमले च गै मारे गेदे भारतीय नौसेना दे लेफ्टिनेंट विनय नरवाल हुंदी माता होरें बी भारत दी कार्रवाई पर संदोख प्रगट करदे होई आखेआ ऐ जे भारती फौज आसेआ कीती गेदी एह कार्रवाई आतंकी हमले च अपनी जान मोहाने आहलें गी इक श्रद्धांजलि ऐ।

<><><><><><>

### Reactions Operation Sindoor

आप्रदेशन सिंदूर पर मुख्य भरै च आम लोकें ते सियासी लीडरें दी प्रतिक्रिया हासल होआ करदी ऐ जेदे च भारती फौज दी इस दलेरी आहली कार्रवाई दी सराहना कीती जा रदी ऐ। गृह मंत्री अमित शाह होरें एहदे पर अपनी प्रतिक्रिया दिंदे होई आखेआ जे पहलगाम आतंकी हमले च मारे गेदे स्हाड़े भाएं दी मौत दा बदला भारत नै इस कार्रवाई राहें लेई लैता ऐ। उनें आखेआ जे भारत ते भारत दे लोकें पर हमला करने आहलें गी बनकदा परता देइयै मजा चखाने दा मोदी सरकार नै पक्का निश्चा कीते दा ऐ।

रक्षा मंत्री राजनाथ सिंह होरें ऑपरेशन सिंदूर पर अपनी प्रतिक्रिया दिती ऐ। एह अभियान पहलगाम च होए दे आतंकवादी हमले जेदे च 26 लोक मारे गे हे, दी पच्छौकड़ै च होआ ऐ। अपने सोशल मीडिया पोस्ट पर रक्षा मंत्री होरें लिखेआ “भारत माता की जय”।

पहलगाम आतंकी हमले दे परते च भारतीय थेआरबंद बलें आसेआ पाकिस्तान ते पाकिस्तान दे नजैज कब्जे आहले जम्मू-कश्मीर दे किश इलाकें च आतंकी ठकानें गी नशाना बनाए जाने दे किश गै घंटे बाद विदेश मंत्री एस जयशंकर होरें इक सख्त संदेश दिता ऐ। उनें सोशल मीडिया पर इक पोस्ट च आखेआ जे पूरी दुनिया गी आतंकवाद खलाफ सख्त ते इसी दना बर्दाश्त नेई

करने आहला रौं दस्सना लोडचदा। लोकसभा च विपक्ष दे नेता राहुल गांधी होरें एहदे पर प्रतिक्रिया दिंदे होई आखेआ जे उनेंगी भारतीय थेआरबंद बलें पर मान ऐ। कांग्रेस पार्टी दे राष्ट्रीय अध्यक्ष मल्लिकार्जुन खडगे होरें आखेआ जे कांग्रेस पार्टी भारतीय सेना पर मान करदी ऐ जिन्नै पाकिस्तान ते पी.ओ.जे.के च आतंकी ठकानें गी नशाना बनाया ऐ। होर केई पार्टिएं दे नेताएं बी इस कार्रवाई दी सराहना करदे होई सेना दी सिफ्त कीती ऐ।

<><><><><><>

### World-Reaction

छडे भारत दे लोक गै नेई पूरी दुनिया दे बड्डे मुख्य ते नेताएं बी आतंकवाद खलाफ कार्रवाई च भारत दा पक्ख लेंदे होई आप्रदेशन सिंदूर पर अपनी प्रतिक्रिया दिती ऐ। अमरीकी राष्ट्रपति डोनाल्ड ट्रम्प होरें आखेआ जे दुनिया गी पता हा जे पहलगाम आतंकी हमले दी प्रतिक्रिया च किश ना किश जरूर होग। कन्नै गै ट्रम्प होरें मेद प्रगट कीती जे भारत ते पाकिस्तान बश्कार तनोतनी तौले खत्म होग। भारत च इस्राइल दे राजदूत रियुवेन अजर होरें भारत दी इस कार्रवाई पर प्रतिक्रिया दिंदे होई आखेआ ऐ जे इस्राइल भारत दे आत्मरक्षा दे अधिकार दा समर्थन करदा ऐ। सोशल मीडिया प्लेटफार्म एक्स पर उनें लिखेआ जे आतंकवादिएं गी पता होना लोडचदा जे बेकसूरें खलाफ जालमाना अपराध करने आहलें दे छुप्पने लेई कोई थाहर नेई ऐ।

<><><><><><>

### Local-Reaction

जम्मू-कश्मीर दे मकामी लोक बी आतंकवादिं खलाफ पाकिस्तान ते मकबूजा कश्मीर च कीती गेदी कार्रवाई दी सराहना कीती ऐ। आकाशवाणी जम्मू कन्नै गल्ल करदे होई किश लोकें अपनी प्रतिक्रिया इस चाल्ली दिती।

.....बाईट.....

<><><><><><>

JK-Killed

भारतीय सेना नै आखेआ ऐ जे पाकिस्तानी बलें आसेआ पुंछ ते राजौरी इलाके च संघर्ष विराम दी इक बारी फी खिलाफवर्जी करदे होई गोलाबारी कीती ऐ। सोशल मीडिया दी इक पोस्ट च भारतीय फौजें आखेआ ऐ जे औदे आसेआ पाकिस्तान दी इस हिमाकत दा शैल बनकदा परता दिता जा'रदा ऐ। जानकारी मूजब पाकिस्तानी कार्रवाई च पुंछ जिले दे मनकोट इलाके च 9 जनें दी मौत होई गई ऐ। जिस्सलै जे 41 होरनें दे घायल होने दी खबर ऐ। जम्मू प्रांतें दे प्रशासन नै एहतियात दे तौरा पर जम्मू, साम्बा, कठुआ, राजौरी ते पुंछ जिले च स्कूल अज्ज बंद रखने दा फैसला लैते दा ऐ।

<><><><><><>

India-Operation Sindoor

भारतीय सशस्त्र बलें पाकिस्तान ते पाकिस्तान दे नजैज कब्जे आहले जम्मू ते कश्मीर दे किश इलाकें च अर्धी रातीं दे बाद आतंकवादी ढांचे पर नशाना लांदे होई ऑपरेशन सिंदूर गी अंजाम दिता ऐ। जिनें ठकानें पर सशस्त्र बलें हमला कीता ऐ, उनें ठकानें थवां भारत खिलाफ होए दे केई आतंकवादी हमले दे निर्देश दिते गए ते योजना बनाई गई ही। इनें ठकानें पर गै

आतंकवादिएं गी सिखलाई दिती जंदी ही। रक्षा मंत्रालय नै इक बयानै च आखेआ ऐ जे 9 आतंकवादी ठिकानें गी निशाना बनाया गेआ। इस बारै अज्ज नमीं दिल्ली च प्रेस वार्ता दा आयोजन करियै देश ते दुनिया गी आप्रेशन सिंदूर बारै तफसीली जानकारी दिती। इस मौके विदेश सचिव विक्रम मिसरी होरें दस्सेआ जे भारतीय एजेंसिएं गी जानकारी ही जे पाकिस्तान तरफा औने आहले आतंकवादी होर हमले करी सकदे न, इस करियै भारत नै उनेंगी पैहले गे मारी मकाने दा फैसला लैता। उनें दस्सेआ।

.....बाईट.....

प्रेस वार्ता दे दौरान विंग कमांडर व्योमिका सिंह ते कर्नल सोफिया कुरैशी होरें आप्रेशन सिंदूर दी कार्रवाई दे वीडियो दी मदद कन्नै पूरी ते तफसीली जानकारी दिती। उनें दस्सेआ जे रातीं 1 बज्जियै 5 मिनट सवां लेइयै डेढ बजे तोड़ी चलाए गेदे आप्रेशन सिंदूर दा मकसद पहलगाम आतंकी हमले दे साजिशकर्ताएं गी सबक सखाना ते उनें ठकानें गी नष्ट करना हा जित्थे आतंकवादिएं गी सिखलाई दिती जंदी ऐ ते दुनिया दी शांति भंग करने लेई उनेंगी तैयार कीता जंदा ऐ। कर्नल सोफिया कुरैशी होरें दस्सेआ।

<><><><><><>

### CM-Reaction

मुख्यमंत्री उमर अब्दुल्ला होरें भारत दी इस कार्रवाई पर अपनी प्रतिक्रिया दिंदे होई आखेआ।

<><><><><><>

### LG-CM Review

ताजा घटनाक्रम गी ध्यानै च रखदे होई जम्मू-कश्मीर दे उपराज्यपाल ते मुखमंत्री होरें हालात दा जायजा लैता ऐ। उपराज्यपाल मनोज सिन्हा होरें बन्ने कन्नै लगदे जिलें दी समीक्षा लेई सभ्भनें सीनियर, प्रशासनिक, पुलस ते जिला अधिकारिएं कन्नै बैठक लाई। इस बारे अपने इक संदेश च उनें आखेआ जे सरकारै हालात पर नेइमी तक्क रक्खी दी ऐ ते अस्स कुसै बी चाल्ली दी स्थिति कन्नै निब्बइने लेई पूरी चाल्ली तैयार ऐ। मुखमंत्री उमर अब्दुल्ला होरें बी नियंत्रण रेखा ते अंतरराश्ट्री बन्ने कन्नै लगदे इलाकें दी सुरक्षा तैयारिएं दा जायजा लैता।

<><><><><><>